

# Lettres patentes

DV ROY, POVR L'ENTRE-  
tenement du dernier Ediçt de  
Pacifiçatiõ, & Articles arrestez en  
la Conference de Nerac: & pour  
faire saisir les biens de ceux qui se  
sont esleuez en armes, contre la  
teneur dudiçt Ediçt & Articles.

*Publié en Parlement le sixième  
iour de Iuin, 1580.*



A PARIS,

Par Federic Morel Imprimeur  
ordinaire du Roy.

1580.

*Aucc Priuilege dudiçt Seigneur.*

Case  
F

39.

.326

15808

THE NEWBERRY  
LIBRARY



# LETTRES PATENTES

*du Roy, pour l'entretienement du dernier Edict de Pacification, & Articles arrestez en la Conference de Nerac: & pour faire saisir les biens de ceux qui se sont esleuez en armes contre la teneur dudit Edict & Articles.*



ENRY par la grace de Dieu Roy de Frâce & de Pologne, A tous ceux qui ces presentes lettres verront, Salut. Comme depuis la conclusion de nostre dernier Edict de pacification, nous n'ayons cessé de tenter tous moyens qui nous ont esté possibles, pour en faire recueillir à tous

A ij

nos subiets le fruit que nous auons  
 desiré de leur promouoir par ice-  
 luy, & de les faire viure les vns avec  
 les autres en toute vniõ, paix & ami-  
 tié, avec vne entiere obliuiõ des maux  
 soufferts de part & d'autre, pendant  
 le temps que les troubles auoient eu  
 cours. Et soit ainsi que nous n'ayons  
 rien oublié en cela du soing paternel  
 que peut auoir vn bon Roy sur ses  
 subiets, enuers lesquels a esté tes-  
 moignée nostre amitié & affection  
 de toutes les façons qu'elle se pouuoit  
 exprimer: dont il est aduenü par la  
 grace de Dieu, que plusieurs de nos  
 Prouinces sont demeurees pacifi-  
 ques, ausquelles ceux qui font pro-  
 fession de la religion pretendue re-  
 formee ont vescu, comme ils vivent  
 encores aujourd'huy, paisiblement  
 avec nos autres subiets catholiques,  
 iouyssans tous ensemble d'un heu-  
 reux

reux repos & tranquillité fous le  
 benefice dudiect Edict: lequel pour  
 auoir cogneu n'estre bien estably ny  
 executé en d'autres Prouinces, la  
 Roynes nostre treshonoree Dame &  
 Mere, qui n'a iamais espargné aucu-  
 ne peine ny trauail pour aduancer le  
 bien de nostre Royaume, s'y seroit  
 fort volontiers acheminee, & en vn  
 long & fort incōmode voyage qu'el-  
 le y auroit faict, accompagnee d'au-  
 cuns Princes de nostre sang, & autres  
 grands personnages de nostre Cōseil  
 priué & d'Estat, elle auroit recerché  
 tous moiens propres & conuenables  
 pour faire establir & executer iceluy  
 Edict: pour lequel effect elle seroit  
 entree en cōference avec nostre tres-  
 cher & tres-amé beau-frere le Roy de  
 Nauarre, & aucuns deputez de nos  
 subiets faisans profession de ladicte  
 religion pretendue reformee. Aiant



accordé avec eux les articles de la  
Conference de Nerac, que nous au-  
rions depuis approuuez & ratifiez, &  
faict publier par toutes nos Courts  
de Parlemens. En esperâce que ceux  
de ladiète religion pretendue reform-  
mee, qui par lesdicts articles ont eu  
quelque extension fauorable plus  
grande que ce qui estoit contenu en  
nostredit Edict, seroient de tant plus  
induits à embrasser le repos que nous  
leur auons voulu donner, & delaisser  
le scrupule de desfiance qui disoient  
les trauailler: dõt tant s'en faut qu'ils  
aient fait leur profit, qu'au contraire  
ils n'ont, en la plus part des lieux, te-  
nu aucun compte de satisfaire au  
contenu dudit Edict, & Articles d'i-  
celle conference, contre la promesse  
& iuremēt solennel qu'ils en auroiēt  
fait: ne s'estans pas contentez de ne  
point rendre & remettre les villes  
qui

qui leur auoient esté baillees en garde pour certain tēps, au terme pour ce arresté & prefix. Mais en aiant pris d'autres par force & violence, en la prise desquelles ont esté exercez infinis meurtres, rançonnemens, massacres, & autres actes inhumains sur nos subiets Catholiques. Comme il se peut dire estre adueni en la ville de Mande, & plusieurs autres villes des pays de Guienne, & Languedoc, qu'ils deriennēt encores aujourd'huy contre nostre volōté: à quoy auroit esté adioustee la venue inopinee de nostre trescher & tresamé cousin le Prince de Condé à la ville de la Fere en Picardie, sans nous en auoir aduertir, ny eu sur ce nostre congé ny permissiō. Auquel lieu encores qu'il ne peust auoir sa demeure, qui luy est destinee à saint Iean d'Angely, suivant le trente-quatriēme des articles

secrets faits avec ledit Ediēt de pacification. Ce neantmoins en vſant de noſtre plus grande bonté enuers luy, & voulās eſſayer de vaincre les mauuais deſſeings de ceux qui ont enuie de troubler noſtre Royaume, Nous aurions eu agreable, qu'il y peuſt demeurer au lieu dudīt ſainēt Ieā d'Angely, à la charge de ſ'y contenir doucement, ſans troubler le repos de la Prouince, de faire vuidier la garniſon qui eſtoit audīt ſainēt Iean, & de le remettre en tel eſtat qu'il deuoit eſtre, ſuiuant noſtredit Ediēt au bout de ſix annees. A quoy noſtredit couſin n'auroit aucunement de ſa part ſatisfaiēt. Ains pendant ſon ſejour de la Fere ſe ſeroient assemblez beaucoup de gens en armes de ceux de ladiēt nouuelle religion, qui auroient tenté des entrepriſes ſur aucunes des places de noſtredit pays de  
Picardie,



Picardie, & Isle de France, faiēt plusieurs incursions, leuees de deniers & contributions de viures sur nos bons subiets Catholiques, & autres violences à leur grande ruine & oppression : comme ils y continuent encores de present: ensemble en plusieurs autres de nos Prouinces, esquelles ils prennent prisonniers nos bons subiets Catholiques, chassent les Ecclesiastiques de leurs Eglises, occupent & detiennent par force leurs biens & possessions, leuent les deniers de nos tailles, & saisissent ceux de nos receptes : Tous actes biē esloignez du deuoir, reuerence, & obeïssance que nous deuons attendre, & qui nous est deuë par nos subiets: Pour lesquels ceux qui les ont commis, font, suiuant le vingt-cinquième article de ladite cōference, declarez criminels de leze Maieité,

eux & leur posterité infames & inhabiles à iamais de tous honneurs, charges, dignitez, & successiōs, ainsi que plus amplement le contient iceluy article. Et comme nous entendons estre procedé contre eux, suivant la rigueur de nostre susdit Edict & articles d'icelle conference: Ainsi nostre volonté & intention est, de maintenir & conseruer ceux qui se contiennent selon le deuoir, de l'obeïssance duquel ils nous sont naturellement obligez.

Et à ceste cause sçauoir faisons que nous, apres auoir meurement consideré sur ceste affaire avec la Royne nostre treshōnoree dame & mere, les Princes de nostre sang, & autres grands Princes & Seigneurs de nostre conseil priué & d'Estat, estans pres de nous: Auons par leur aduis, & de nostre pleine puissance  
&

& auctorité Royale, de nouveau dit, declairé & ordonné, disons, declairons & ordonnōs, Que aymans, cōme nous faisons, le bien de nos subiects, & desirans euitertoutes occasions qui peuuent faire renaiistre les troubles en nostre Royaume, nous voulons & entendōs, que nostre susdit Edict de Pacification & les articles de ladicte Conferēce de Nerac, soiēt maintenus, gardez & obseruez inuiolablement, selon leur propre forme & teneur. Et que ceux de nos subiects de la Religion pretendue reformee, qui se voudront contenir sous iceulx, comme l'obeissance & loyauté qu'ils nous doiuent les y oblige, soient conseruez en leurs personnes, vies & biēs, en tous les endroiets de nostredit Royaume, avec liberté de leur consciēce & exercice de leur dite religion, selon qu'il est permis

par iceux Edict & Articles d'icelle  
 cōferēce de Nerac, sans qu'il leur soit  
 en cela donné aucun trouble ny em-  
 peschement. Et là où aucuns d'iceux,  
 de quelque estat, qualité ou condi-  
 tion qu'ils soient, auroiēt esté si mal  
 aduisez, que de s'esleuer en armes  
 pour troubler le repos publicq, con-  
 tre l'obeissance qu'ils nous doiuent,  
 feroient partis de leurs maisons à  
 cest effect, ou pour se retirer hors de  
 nostre Royaume en Allemagne ou  
 ailleurs, à fin de adherer & participer  
 avec ceux qui font praticques & me-  
 nees pour amener des gens de guerre  
 estrangers cōtre nostre seruice, à l'of-  
 fension de nos bons & loyaux sub-  
 iets. Nous voulons que apres deuë  
 perquisition & information faicte  
 par les gens de nos courts de Parle-  
 mens, Baillifs, Seneschaux, Preuosts,  
 leurs Lieutenans, ou autres nos Iuges  
 Royaux



Royaux de ceux qui seront de la qualité susdicte, ils procedēt à la saisie de leurs biens meubles & immeubles, faisant faire bon & loyal inuentaie desdicts meubles, & les baillent en garde à quelque bon & notable personnage, pour estre procedé à la vente d'iceulx au plus offrant & dernier encherisseur, sans que les acheteurs puissent estre à l'aduenir contraincts de rendre & restituer les choses par eulx ainsi achetees, quelques declaracions qui puissent estre expediees au contraire. Et ce non obstant oppositiōs ou appellations quelscōques proposees ou à proposer par les femmes, enfans, heritiers, creanciers, ou autres pretendants droict sur les biens susdicts pour saisies au parauant faictes ou autrement, sur lesquelles oppositions ils aurōt à se pourueoir en la Chambre



de l'Edict de Pacificatiō, qui se trou-  
 uera establie en nosdictes Courts de  
 Parlemens. Et là où il n'y auroit au-  
 cune Chambre de l'Edict establie, se  
 vuyderont icelles oppositions en la  
 grād Chambre de nosdictes Courts  
 de Parlemens, sous le ressort des-  
 quelles se trouueront lesdicts biens:  
 & quant aux immeubles, nous vou-  
 lons qu'ils soient semblablement fai-  
 siz sous nostre main, & que au re-  
 gime & gouuernement d'iceux soiēt  
 establiz de bōs & suffisans Commis-  
 saires, qui seront contraincts en ac-  
 cepter la charge & commissiō, non-  
 obstant toutes excuses, exemptions,  
 & priuileges generaux & particuliers  
 qu'ils peussent alleguer au contraire.  
 Pour estre par apres procedé au plu-  
 stost que faire se pourra au bail à fer-  
 me, au plus offrant & dernier enche-  
 risseur, en la maniere accoustumee  
 pris

pris & perceuz les fruiçts d'iceux :  
 Nonobstant toutes oppositions ou  
 appellations quelsconques , qui se-  
 rôt iugees & decidées ainsi que des-  
 sus est dict desdicts meubles. N'en-  
 tendans que en vuidant icelles oppo-  
 sitiōs l'on ayt aucun esgard aux pre-  
 tendues aduances que aucuns fer-  
 miers pourroiet alleguer, ny que les  
 creanciers puissent estre payez sur les  
 meubles & fruiçts saïfiz & vendus  
 comme dict est. Pourueu que les im-  
 meubles soient suffisans, & qu'il ap-  
 paroisse que la debte a esté crée sans  
 fraude & simulation. Semblablemēt  
 à ce que les femmes pourroient dire,  
 que les meubles & fruiçts des im-  
 meubles leur appartiennent, comme  
 estans de leur dot & propre. Sauf à  
 noz Iuges de leur ordōner pour leur  
 viure & entretenemēt telle prouisiō  
 moderee qu'ils auiseront bon estre.

Comme ils ferōt en semblable pour la nourriture des enfans desquels les peres ont la gardenoble, & iouissent des fruiçts de leurs biens, pourueu que lesdictes femmes & enfans se contiennent sous nostre obeissance, sans participer, adherer ou fauoriser ausdits esleuez en armes en quel que sorte ou maniere que ce soit : demeurās neantmoins ausdicts opposans leurs actions entieres sur lesdicts immeubles ainsi que de droict.

Defendons en outre à tous ceux qui doiuent aux susdicts esleuez en armes, ou leurs adherans & complices, rente ou autre chose, de leur en rien payer, ains leur enioignons de le venir declairer à nos Iuges incontinent apres la publication de ces presentes sur peine du quadruple, & d'estre procedé contre eux criminellement comme fauteurs & adherans ausdits

ausdicts esleuez. Faisons aussi tres-  
 expresses inhibitions & defences à  
 toutes personnes d'acheter aucune  
 chose des susdicts esleuez en armes,  
 de leurs adherans & complices, de-  
 clairans des à present tout ce qu'ils  
 auront acheté, à nous acquis & con-  
 fisqué. Voulons en outre estre pro-  
 cedé contre lesdicts acheteurs crimi-  
 nellement : de tous lesquels deniers  
 prouenus de la vente d'iceux meu-  
 bles, & fruits des immeubles, seront  
 dressez de bōs & amples proces ver-  
 baux par les commissaires à ce com-  
 mis, qui les mettront és mains des  
 Thresoriers de France, Generaux de  
 nos finances en la generalité, sous  
 l'estendue de laquelle se trouueront  
 lesdits meubles, & seront situez &  
 assis iceux immeubles. Sur lesquels  
 proces verbaux nosdits Thresoriers  
 generaux dresseront leurs Estats aux



receueurs particuliers des lieux: pour estre lesdicts deniers par eux receus, & mis és mains des Receueurs generaux de nos finances. Et employez par les mandemens, rescriptions ou quictances des Thresoriers de nostre espargne, en l'acquit des despenses que nous serons contrainsts & forcez faire à l'entretienement des gens de guerre que nous mettrons sus pour resister aux entreprises & pernicieux desseings de ceux qui se sont esleuez en armes contre nostre autorité, & veulent troubler le repos public de nostredict Royaume. Voulans en outre que nosdits Officiers vacquent en toute diligence, & tous autres affaires cessans, à faire & parfaire le proces criminel & extraordinaire ausdicts esleuez, leurs fauteurs & adherans, & procedent aux iugemens & arrests contre les susdicts, selon la rigueur



rigueur de nos Edicts & Ordonnances.

SI donnons en mandement à nos amez & feaux les gens tenans nos Cours de Parlements, Baillifs, Seneschaux, Preuosts ou leurs Lieutenans & autres nos Iuges, que noz presens declaration, vouloir & intention, ils facent publier, verifier, & enregistrer en nosdictes Courts & sieges particuliers, à ce que chacun en ait bonne cognoissance, entretenir, garder, & obseruer, sans qu'il y soit contreuenue en quelque sorte ou maniere que ce soit, ou puisse estre. Mandant à nos Aduocats & Procureurs generaux & particuliers, d'y tenir la main de leur part, & nous aduertir du deuoir & diligence dont il aura esté vsé à l'exécution de cesdictes presentes. Lesquelles en tesmoing de ce nous auons voulu signer de

nostre propre main , & à icelles faict  
mettre & apposer nostre seal. Car tel  
est nostre plaisir.

Donné à Paris le troisiéme iour  
de Iuin, l'an de grace mil cinq cens  
quatre vingts, & de nostre regne le  
septiéme.

Signé, HENRY.  
Et plus bas est escript, Par le Roy  
estant en son Conseil,

BRVLART.

Et au dessoubs,

*Leuës , publiees & registrees , oy & ce  
requerant le Procureur general du Roy.  
Et en seront enuoyees copies aux substi-  
tuts dudit Procureur general és Baillia-  
ges, Seneschancez, Prenostez de ce ressort,  
pour à leur diligence y estre publiees &  
executees : & de la publication & exe-  
cution en certifieront la Court.*

*A Paris*

A Paris en Parlement le sixième iour  
de Iuin, l'an mil cinq cens quatre vingts.

Ainsi signé, DE-HEVEZ.

Leuës & publices en Iugement au parc  
Ciuil du Chastellet de Paris l'Audience  
tenant, & registrees, oy & ce requerant  
le Procureur du Roy audict Chastellet le  
Mercredy huitième iour de Iuin, l'an mil  
cinq cens quatre vingts.

Ainsi signé, DROVART.

## *Sommaire du Priuilege.*

P A R Lettres patêtes du Roy, donnees à Paris le quatrième iour de Mars, mil cinq cents soixante-vnze, signees sur le reply, Par le Roy, Monsieur le grand Aumosnier present, D E N E V F V I L L E, & sceellees du grâd seel dudit Seigneur, en cire iaune, sur double queuë: verifiees tant en la Cour de Parlement, Chambre des Comptes, des Aides, que au Chastellet de Paris: Il est permis à Federic Morel son Imprimeur ordinaire d'imprimer, ou faire imprimer, vendre & debiter tous Edicts, Ordonnances, Mandemens, & Lettres patentes, sans qu'autres Libraires & Imprimeurs les puissent imprimer ne faire imprimer, si ce n'est du vouloir & consentemēt dudit Morel: sur les peines contenues esdictes Lettres. En oultre a ledict Seigneur voulu, que apposant par ledit Morel vn extrait sommaire de ses Lettres, au commencement ou à la fin de chascun des Liures qu'il imprimera, elles soient tenues pour suffisammēt notifiees & venues à la cognoissance particuliere de tous ceulx qu'il appartiendra, sans qu'ils en puissent pretēdre cause d'ignorāce.

La confirmation de ce que dessus, avec ampliation, a esté octroyee audict Morel le vingtième d'Apiril, 1575. Par le Roy, De Neuf-ville.

Et le xxi. iour de Feurier, 1578.

Signé,

F I Z E S.





